

ԲԻԱՅՆԻԼԻ-ՈՒՐԱՐՏՈՒՆ ԾԱՂԿՄԱՆ ԴԱՐԱՇՐՋԱՆՈՒՄ

Ն. Վ. ՀԱՐՈՒԹՅՈՒՆՅԱՆ

Ուրարտուի՝ Առաջավոր Ասիայի այդ երբեմնի հղորդույն ստրկատիրական պետության պատմության մեջ առանձնահատուկ տեղ է զբաղում շուրջ երեք քառորդ դար ընդգրկող մի ժամանակաշրջան, որը հարատևում է Արգիշտի I-ի թագավորության սկզբից (մ. թ. ա. 786 թ.) մինչև Ռուսա I-ի տիրապետության նախավերջին տարին (մ. թ. ա. 714 թ.)։ Հենց այդ պատմական հատվածն էլ (բացառելով Սարգուրի II-ի մեկ-երկու մասնակի անհաջողությունները մ. թ. ա. 743 և 735 թթ.), երբ Վանի թագավորությունը հիմնականում ապահովում է իր առաջնությունը Առաջավոր Ասիայում, իրավամբ կարելի է անվանել Բիայնիլի-Ուրարտուի ծաղկման դարաշրջան։

Հիշյալ դարաշրջանում Ուրարտուի պատմության առավել աչքի ընկնող դեմքը Արգիշտի I-ն էր, որի տիրապետության սկզբնական տարիներին (մ. թ. ա. 785—784 թթ.) Վանի թագավորությունը նվաճողական պատերազմներ էր մղում հեռու հյուսիսում։ Այստեղ ուրարտական բանակը մի կողմից հասնում է մինչև Դիաուխի (պատմական Տայք), Տարիունի (Դարոյնք), Ջաբախա (Ջավախք), Իգա (Չալդեր լճի հարավում)։ մյուս կողմից՝ մինչև էթիոպյան ցեղային միության լայնատարած տերիտորիան (Սարիղամիշից մինչև Սևանա լիճը)։ Ավելի հարավում, հայկական Շիրակում, Արգիշտին նվաճում է էրիախի երկիրը, իսկ Արաքսի վերին հոսանքում՝ Աբիլիանին (Աբեղեանք), Աբունին (Հավնունիք), Ուիտերուխին, Իրկուան կամ էրիկուան և այլն¹։

Արգիշտի I-ի մ. թ. ա. 782 թ. արշավանքները հյուսիսում նորանոր հաջողություններ են բերում Ուրարտուին։ Այս անգամ նա ոչ միայն անցնում է Արաքսը, այլև ամրանում նրա ձախ ափին (մի հանդամանք, որ երբեք չէր հաջողվել նրա նախորդին՝ Մենուային)։ Կտրելով, այնուհետև, Արարատյան դաշտավայրը և արշավելով դեպի հյուսիս, նա զբաղում է Ուլուանի² և Կիեխունի³ երկրները և հասնում Սևանա լճի հյուսիս-արևմտյան ափերը՝ Բշտիկունի, Լիկիու⁴։ Այսպիսով, Արգիշտի I-ին հաջողվում է տիրել Արարատյան արգավանդ դաշտավայրին և դեպի Սևանա լիճը ձգվող բարձրագիծ արոտավայրերին։ Այդ

¹ Н. В. Арутюнян, Хорхорская летопись Аргишти I. «Эпиграфика Востока», VII, М.-Л., 1953, էջ 86—90, 1 սյունակ, տող 5—12, 17—37։

² Տե՛ս Արգիշտի I-ի էլառի արձանագրությունը։ Г. А. Мелликишвили. Урартские клинообразные надписи, М., 1960 (այսուհետև հապաված՝ УКН), արձանագրություն 131։

³ Այս երկրի մասին հիշատակում է նաև Արգիշտի I-ի լճաշենում (Սևանա լճի հյուսիս-արևմտյան ափին) հայտնաբերված արձանագրությունը (УКН, 134)։

⁴ Այդ երկրների տեղագրման մասին տե՛ս Н. В. Арутюнян, Некоторые вопросы топонимики Урарту, «Պատմա-բանասիրական հանդես», 1963, № 1, էջ 187—192։

նվաճումները հնարավորություններ են ընձևում լրացուցիչ երկրագործական և անասնապահական մթերքներ ստանալու ուրարտական պետության օրավուր աճող կարիքների համար:

Արարատյան դաշտավայրում վերջնականապես հաստատվելու և Ուրարտուի տիրապետությունը Սևանի ավազանում ու ընդհանրապես հյուսիսում հետագայում ևս ապահովելու նպատակով այժմյան Երևանի հարավ-արևելյան ծայրամասում մ. թ. ա. 782 թ. Արգիշտի I-ը կառուցում է էրերունի ռազմաստրատեգիական քաղաք-ամրոցը⁵: Գառնիի 1963 թ. նորագյուտ արձանագրության համաձայն Արգիշտին նվաճել է Գիաոնիա(նի) հրկիրը⁶: Մ. թ. ա. 782 թ. Արգիշտի I-ը նվաճումներ է ձեռնարկել նաև հյուսիս-արևմուտքում⁷:

Ուրարտուի ռազմական ձիգերի մյուս կարևորագույն բնագավառը հարավային և արևմտյան երկրներն էին, ուր նրա ձգտումները բախվում էին Ասորեստանի շահերի հետ:

Մ. թ. ա. 783 թ. հարավ-արևմուտքում Արգիշտին հաղթանակ է տանում Նիրիբա (այժմյան Տուր-Արդին լեռներում) և Խատե (Հյուսիսային Ասորիքում), իսկ արևմուտքում՝ Մելիտեա (հայկ. Մալաթիա), Կամանա(?) (ասորեստ. Կամ-մանու) և մի շարք այլ երկրների նկատմամբ⁸: Ինքնին հասկանալի է, որ Ուրարտուի հաղթանակը Խատե երկրում, վերջին հաշիվով, նշանակում էր Ասորեստանի ստրատեգիական դիրքերի գիջում Ասորիքում: Հյուսիս-Ասորիքյան միությունը, որ համախմբվել էր Արպազի շուրջը և մինչև այդ կողմնորոշվում էր դեպի Ասորեստանը, այժմ հակվում է դեպի Ուրարտուն: Դրա հետևանքով Ասորեստանը կամա-ակամա կտրվում է ոչ միայն Ասորիքից, այլև երկաթի ու այլ մետաղների հանքավայրերից Փոքր Ասիայում⁹:

Սկսած Արգիշտի I-ի թագավորության VI տարվանից (մ. թ. ա. 781 թ.) Ուրարտուի քաղաքական պատմության սեջ արմատական բեկում է նկատվում: Ուրարտական պետությունը արդեն բավականաչափ կաղզուրվել էր հյուսիսում, արևմուտքում և հարավ-արևմուտքում սուրած հաղթանակների շնորհիվ: Այժմ նա իրեն նախապատրաստված էր ղգում ուժերը անմիջականորեն շափելու իր գլխավոր ախոյանի՝ Ասորեստանի հետ: Եվ այսպես, մ. թ. ա. 781 թ. սկսվում է Ուրարտուի և Ասորեստանի հուժկու և անընդմեջ ռազմական բախումների փուլը, որը հարատևում է տարիներ շարունակ: Հիշյալ տարում Արգիշտի I-ը ընկճում է ասորեստանյան ղորքը, որն ըստ երևույթին մուտք էր գործել Ուրարտուի սահմանները Վանա լճից հարավ: Սկզբում ձակատամարտը տեղի է ունենում Խուրուշկիայում (տեքստում հիշատակվում է սոսկ նրա թագավոր Դադին), Բոհտանի հովտում, իսկ այնուհետև ուրարտական ղեկավարը սրընթաց արշավում է դեպի հարավ-արևելք՝ Սանային հարևան Արաի(տա) երկիրը, Ուրմիա լճից

⁵ Այդ մասին մանրամասն տե՛ս Ն. Վ. Հարությունյան, Երևանի հիմնադրման ժամանակի հարցի շուրջը, «Պատմա-բանասիրական հանդես», 1959, № 2—3, էջ 78—96:

⁶ Б. Н. Аракелян, Находка урартской надписи в Гарни, «Пատմա-բանասիրական հանդես», 1966, № 2, էջ 290—293: Н. В. Арутюнян, Чтение и интерпретация урартской надписи из Гарни, *նույն տեղում*, էջ 293—297:

⁷ Արգիշտի I-ի V տարվա ձեռնարկումների մասին տե՛ս Խորխորյան տարեգրության II սյունակի 25—45 տողերը, նրա կրկնադրի (դուբլիկատի) հատվածներից մեկը (УКН, 128A2, տող 1—30) և Արին-բերդի արձանագրությունները (УКН, 138 և Посл., 11):

⁸ Տե՛ս Խորխորյան տարեգրություն, II սյունակ, տող 5—18:

⁹ „Всемирная история“, I, էջ 338:

շատ ավելի հարավ ընկած մի շարք այլ տերիտորիաներ՝ հասնելով ընդհուպ մինչև Դիալայի միջին հոսանքները (Բարիլու)¹⁰։ Այս արշավանքի ճանապարհին հպատակեցվում են նաև Բուշտու, Բարուատա, Բարշուա երկրները¹¹, որոնք այդ ժամանակ, հավանաբար, գտնվում էին Ասորեստանի ազդեցության ոլորտում։ Ուստի այդ երկրների դեմ Ուրարտուի տարած հաղթանակը ևս, վերջին հաշվով, պետք է դիտել որպես հաղթանակ հենց Ասորեստանի նկատմամբ։

Պայքարը Ուրարտուի և Ասորեստանի միջև շարունակվում է նաև հաջորդ տարում (մ. թ. ա. 780 թ.)։ Խորխորյան տարեգրության հիշյալ VII տարվա տվյալները նորից հաղթանակ են հավաստում ասորեստանյան զորքի նկատմամբ, որը կրկին մխրձվել էր Ուրարտուի հարավային սահմանները (Խուրուշկիա)։ Արգիշտին հաջողվում է դարձյալ ընկնել ասորեստանյան զորքերին, որոնք ստիպված են լինում նահանջելու հարավ-արևելյան ուղղությամբ։ Ուրարտական թագավորը հետապնդում է նրանց մինչև Ուրմիա լճից հարավ ընկած որոշ տերիտորիաներ՝ Բուշտու, Արխա և այլն¹²։ Սակայն այս տարվա արդյունքները, նախորդ տարվա համեմատությամբ, նվազ նպաստավոր էին Ուրարտուի համար։ Արգիշտի I-ը, հավանաբար, Ուրմիա լճից հարավ ընկած տերիտորիաներում հանդիպում է ասորեստանյան զորքերի դիմադրությանը, եթե նկատի ունենանք, որ նա այլևս հնարավորություն չի ունենում մտնելու շատ ավելի հարավում ընկած մի շարք այնպիսի երկրներ (Բարուատա, Բարշուա, Բարիլու), որոնք նա գրավել էր ղեռնա նախորդ տարում։ Չնայած դրան, Սալմանասար IV-ի զորահրամաճատար Շամշի-իլուն այդ նույն 780 թ. ա. զոդով խոստովանում էր, թե «Արգիշտի ուրարտացու անունը սարսափելի է որպես ծանր հոգի, որի ուժերը լայնածավալ են և որը նախկին թագավորներից ոչ ոքի ձեռք չի պարզվել»¹³։

Արգիշտիի թագավորության VIII տարվա երկրորդ արշավանքը ձեռնարկվում է Ուրմիա լճից հարավ ընկած Մանա և Բուշտու երկրները, որտեղից ուրարտական զորքը վերադառնում է հարուստ ուղմական ավարով¹⁴։

Խորխորյան տարեգրության IX տարվա միակ արշավանքը նորից ուղղված էր Ուրմիա լճից դեպի հարավ ընկած Ասորեստանին ենթակա երկրները։ Այդ արշավանքի ժամանակ Ուրարտուին հաջողվում է արդեն ոչ միայն հպատակեցնել Մանա, Բուշտու և Իրկիունի երկրները, այլև հասնել ընդհուպ մինչև Ասորեստանի սահմանները¹⁵։ Սակայն այդ հաղթանակը ղեռնա անհրաժեշտ նախադրյալներ չէր ստեղծել Ուրարտուի տիրապետությունը վերջնականապես հաստատելու հիշյալ տերիտորիաներում։ Հենց դրանով էլ պետք է բացատրել այն փաստը, որ հաջորդ՝ X տարում (մ. թ. ա. 777 թ.) Ուրարտուն ստիպված է

¹⁰ Ի. Մ. Դյակոնովի կարծիքով, ըստ երևույթին, նույնական է ասորեստանյան աղբյուրների նամրուին։ И. М. Дьяконов, Ассиро-вавилонские источники по истории Урарту (այսուհետև հապավված՝ АВННУ), «Вестник древней истории» (այսուհետև հապավված՝ ВДИ), 1931, № 2, 3, 4, § 28, ծանոթ. 20. § 38, ծանոթ. 6 և այլն։

¹¹ Տե՛ս Խորխորյան տարեգրություն, II սյունակի 51-րդից մինչև III սյունակի 13-րդ տողերը։

¹² УКН, 127, III, տող 20—40։

¹³ И. М. Дьяконов, АВННУ, 38։

¹⁴ УКН, 127, III սյունակ, տող 60—71 և IV սյունակ, տող 1—13։

¹⁵ Նույն տեղում, IV սյունակ, տող 14—36։ Տե՛ս նաև Խորխորյան տարեգրության այդ մասի, կրկնադիմաց (զուրկիկատը) — УКН, 128В2, տող 1—11։

լինում դարձյալ զբաղվելու Մանայի, Բուշտուի և մերձուրմյան այլ երկրների (Աշկայա, Ուգիշտի¹⁶ և այլն) հպատակեցման հարցով¹⁷։ Չնայած բոլոր դեպքերում Արգիշտի I-ը միմիայն արձանագրում է իր հաղթանակների մասին, սակայն հենց թեկուզ դեպի նույն երկրների ձեռնարկված տարիներ շարունակ կրկնվող արշավանքները վկայում են, որ Ուրարտուին միշտ չէ, որ հաջողվել է հաղթական երթով վերադառնալու արշավանքներից։ Ի դեպ, հենց Մանան խորյան տարեգրության մեջ սիստեմատիկաբար հիշատակվում է նաև հետագա տարիներին՝ ընդհուպ մինչև Արգիշտիի թագավորության XIII տարին (մ. թ. ա. 774 թ.)։

Հարցն այն է, որ ի տարբերություն հյուսիսային երկրների, որոնք ընդհանուր առմամբ համեմատաբար քիչ հնարավորություններ ունեին Ուրարտուի բազմաթիվ ու հզոր զորքերին դեմ-հանդիման կանգնելու, հարավ-արևելյան երկրներում դրությունը ավելի բարդ էր։ Այդ վերաբերում է ամենից առաջ Մանային։ Մի կողմ թողնելով Մանայի սեփական ռազմական հզորությունը, նրա թիկունքում կանգնած էր Ասորեստանը, որի համար չափազանց կարևոր էր Մանայի լայնատարած և հարուստ տերիտորիան իր ազդեցության ոլորտում պահելու խնդիրը։ Հետևաբար, մերձուրմյան շրջանում Ուրարտուն գործ ուներ ոչ միայն Մանայի, այլև, վերջին հաշվով, հենց Ասորեստանի հետ։ Այդ հզորագույն ախոյաններից յուրաքանչյուրը բոլոր ուժերով ջանում էր ապահովելու իր առաջնությունը Առաջավոր Ասիայում ընդհանրապես։

Այսպիսով, չնայած խորխորյան տարեգրությունը հիշատակում է Ասորեստանի հետ Ուրարտուի ունեցած միայն երեք տարիների (VI, VII, IX) ռազմական բախումների մասին (մ. թ. ա. 761, 780, 778 թթ.), բայց անկասկած է, որ այդ բախումները շատ ավելի հաճախակի ու երկարատև բնույթ են կրել։ Որպես դրա ապացույց կարելի է բերել ասորեստանյան էպոնիմների ցուցակները, որոնց համաձայն Ասորեստանը ռազմական արշավանքներ է ձեռնարկել Ուրարտուի դեմ 781—779, 776 և 774 թթ.¹⁸։ այսինքն՝ սկսած 781 թ. չորս տարի անընդմեջ և, այնուհետև, մեկական տարի ընդհատումներով՝ 776 և 774 թթ.։ Հետևաբար, Ուրմիա լճից դեպի հարավ ընկած մի շարք երկրների, առանձնապես Մանայի, Բուշտուի, Բարուասայի, Բարշուայի և Բարիլուի հետ ունեցած ընդհարումները ևս, որոնց մասին հաղորդում է խորխորյան տարեգրությունը, հիմնականում պետք է դասել Ուրարտուի և Ասորեստանի միջև տեղի ունեցած ռազմական բախումների շարքը։ Եվ, իսկապես, խորխորյան տարեգրության VI, VII և IX տարիներին, երբ հիշատակվում է Ուրարտուի և Ասորեստանի միջև տեղի ունեցած դաժան պայքարը, Ուրմիա լճից հարավ ընկած երկրները սիստեմատիկաբար հանդես են գալիս որպես նվաճման օբյեկտներ։ Հարցի այդօրինակ մեկնաբանման դեպքում հստակ կերպով երևում է, որ Արգիշտի I-ի թագավորության ոչ միայն երեք (VI, VII, IX), այլև ոչ պակաս, քան ութ տարիների (VI—XIII) պատմությունը պետք է դիտել որպես Ուրար-

¹⁶ Աշկայան, ըստ երևույթին, համազոր է ասորեստանյան աղբյուրների Ուշկայային. իսկ Ուգիշտին՝ Սիշդիշին։ Այս երկրները ժամանակ առ ժամանակ հանդես են գալիս Մանայի կամ Ուրարտուի կազմում և տեղադրվում են Ուրմիա լճի արևելյան ափերին։

¹⁷ խորխորյան տարեգրություն, IV սյունակ, տող 42—59, ինչպես նաև նրա կրկնագիրը (դուբլիկատ) — УХН, 128В2, տող 23—34։

¹⁸ АВНУ, 39 (ВДИ, 1951, № 2, էջ 306)։

տուի և Ասորեստանի հուժկու և անընդմեջ ընդհարումների մի ժամանակաշրջան¹⁹:

Հարավ-արևելքում Ասորեստանի հետ ունեցած անընդմեջ ռազմական բախումները, բնականաբար, պետք է թերևս որոշ չափով խաբխելին Ուրարտուի դիրքերը հյուսիսում, քանի որ այդտեղ գտնվող երկրները տարեցտարի տնտեսական ու ռազմական վերելք էին ապրում և համախմբվում ընդհանուր ցեղային միությունների մեջ՝ իրենց անկախությունը թշնամական ոտնձգություններից ապահովելու համար: Եվ պատահական չէ, որ իր թագավորության դեռևս VIII տարվա (779 թ. մ. թ. ա.) առաջին արշավանքի ընթացքում Արգիշտին կրկին մարտեր է մղում հյուսիսում՝ Բյա (= Իգա)²⁰ երկրում (Չալդրը լճի հարավային մասում), այն դեպքում, երբ այդ մարզը Ուրարտուի կողմից նվաճվել էր դեռևս Արգիշտի I-ի տիրապետության II տարում (մ. թ. ա. 785 թ.): Ուրարտական թագավորը առանց որևէ դժվարության հնազանդեցնում է Բյա երկիրը, ավերում նրա ամրոցներն ու հրկիզում քաղաքները²¹: Հյուսիսում, այնուհետև, մ. թ. ա. 776 թ. Ադա երկրում տեղի է ունենում Արգիշտիխինիլի վարչատնտեսական կենտրոնի հիմնադրումը²², մ. թ. ա. 775 թ. «Տուարածիի հովիտ» (հայկ. Տուրածատափ) երկրում Դաինալա գետից ոռոգիչ ջրանցքի անցկացումը²³, մ. թ. ա. 774 թ. էթիունի հզոր ցեղային միության լայնատարած տերիտորիայի, ինչպես նաև էրիախիի, Կատարզայի և Ուիտերուխիի բռնագրավումը²⁴:

Արգիշտիխինիլին Արարատյան դաշտավայրում Արգիշտի I-ի մ. թ. ա. VIII դարում հիմնադրած կարևոր կենտրոններից էր: Ի տարբերություն էրեբունիի, Արգիշտիխինիլին, ըստ երևույթին, եղել է ոչ այնքան ռազմա-ստրատեգիական, որքան վարչատնտեսական կենտրոն: Բավական մոտ լինելով բուն Ուրարտուի հյուսիսային սահմաններին և գտնվելով Արարատյան դաշտավայրի գրեթե կենտրոնական մասում, նա վարել է այդ լայնատարած ու բերրի դաշտավայրի հարուստ էկոնոմիկան և, այդպիսով, ապահովել ոչ միայն Ադա տեղական մարզի և ամենից տուաջ նրա տերիտորիայում հիմնադրված էրեբունի և Արգիշտիխինիլի կենտրոնների տնտեսական կարիքները, այլև երկրագործական, այգեգործական-խաղողագործական հարուստ պաշարներ վերամշակել ու մատակարարել Ուրարտուի կենտրոնական իշխանությանը²⁵:

Խորխորյան տարեգրության XIV տարվա (մ. թ. ա. 773 թ.) իրադարձությունների նկարագրության մեջ այլևս ոչ մի խոսք չկա ոչ Ասորեստանի և ոչ

19 Տե՛ս ն. Վ. Հ ա ր ո թ յ ո �ւ ն յ ա ն, Երևանի հիմնադրման ժամանակի հարցի շուրջը. «Պատմա-բանասիրական հանդես», 1959, № 2—3, էջ 84—85:

20 Տե՛ս Н. В. А р у т ю н я н, Заметки по урартской эниграфике, ЗУИՀ ԳԱ «Տեղեկագիր» (հաս. գիտ.), 1957, № 12, էջ 74—76:

21 УКН, 127, III, տող 43—49:

22 Խորխորյան տարեգրություն, IV սյունակ, տող 67—78, V սյունակ, տող 1—4, ինչպես նաև Խորխորյան տարեգրության այդ հատվածի կրկնագիրը — УКН, 128В2, տող 37—42: Արգիշտիխինիլին (Արմավիրը) գտնվում է Հայկական ՍՍՀ Հոկտեմբերյանի շրջանում, Արաքսի ձախ ափին:

23 Տե՛ս Н. В. А р у т ю н я н, Данила-тини. ЗУИՀ ԳԱ «Տեղեկագիր» (հաս. գիտ.), 1957, № 4, էջ 97—106: XII տարվա իրադարձությունների մասին տե՛ս Խորխորյան տարեգրություն, V սյունակ, տող 11—26:

24 Խորխորյան տարեգրություն, V սյունակ, տող 33—63:

25 Ն. Վ. Հ ա ր ո թ յ ո �ւ ն յ ա ն, Երևանի հիմնադրման ժամանակի հարցի շուրջը. «Պատմա-բանասիրական հանդես», 1959, № 2—3, էջ 91, ծանոթ. 6:

էլ նրան ժամանակ առ ժամանակ ենթակա մերձուրմյան երկրների մասին: Տըվ-յայ տարում Արցիշտի 1-ի ձեռնարկած երկու արշավանքներն ուղղված են մի կողմից դեպի Հյուսիս՝ Տարիունի, մյուս կողմից՝ դեպի արևմուտք (Ուրմե)²⁶:

Այնուհետև Արգիշտի 1-ը թագավորում է ևս 8—9 տարի (մինչև մ. թ. ա. 764 թ.), սակայն հորիսորյան տարեգրության շարունակությունը չի հասել մեզ, ուստի ուրարտագիտությունը առայժմ սեղյակ չէ նրա տիրապետության վերջին տարիների իրադարձություններին: Շատ հավանական է, որ մ. թ. ա. 773—764 թթ. Ուրարտուն զգալի հաջողություններ է ունեցել հարավում, հարավ-արևելքում և հարավ-արևմուտքում և այդպիսով Ասորեստանին զրկել մի կողմից Տիգրիսի ու Եփրատի միջին ու վերին հոսանքների, մյուս կողմից՝ Ուրմիա լճի ափերին ու նրանից հարավ ընկած մի ամբողջ շարք ստրատեգիական ու տնտեսական կարևոր նշանակություն ունեցող կենտրոններից: Արգիշտի 1-ի թագավորության վերջին շրջանում Ասորեստանը իր դիրքերը Առաջավոր Ասիայում հիմնովին զիջում է Ուրարտունին և ավելի ու ավելի զամվում իր նախնական, համեմատաբար սահմանափակ տերիտորիային:

Այդպիսի եղրակացության են հանգեցնում ոչ միայն Ուրարտուի ռազմաքաղաքական հզորության անընդհատ աճը, այլև Ասորեստանի արտաքին ու ներքին քաղաքականության նկատելի անկումը: Լիստ ուրում Ասորեստանի թուլացման պատճառները ամենից առաջ պետք է որոնել նրա ներքին հակասությունների, դասակարգային պայքարի սրման մեջ: Այդ մասին վկայում են 827—822, 772—758 թթ. երկրի ներսում տեղի ունեցած կատաղի երկպառակությունները²⁷:

Ինչ վերաբերում է Ասորեստանի այդ ժամանակվա արտաքին քաղաքականությանը, ապա, թերևս փոխարքա-էպոնիմների ցուցակների տվյալների համաձայն, ոչնչով առանձնապես աչքի չի ընկել այն: Ի դեպ, ոչ միայն Ուրարտուի, այլև Միջագետքի, մերձուրմյան շրջանի և Փոքր Ասիայի նրան ժամանակ առ ժամանակ ենթակա երկրների մասին անգամ փոխարքա-էպոնիմների ցուցակները բացարձակապես ոչինչ չեն ակնարկում: Իսկ այդ նշանակում է, որ Ասորեստանը մ. թ. ա. VIII դարի 70-ական թթ. վերջերին ու 60-ական թթ. սկզբներին ուժասպառ էր եղել ներքին ու արտաքին հակասություններից, հետևաբար ի վիճակի չէր այլևս ընդունելու այն մարտահրավերը, որին, նրա իրավունքները ոտնահարելով, երկար ժամանակ կոչում էր իր հզորության զազաթնակետին հասած Ուրարտուն:

Ուրարտուի այդ ժամանակվա հզորության ցուցանիշներից մեկն էլ այն էր, որ Լթև Արգիշտիի թագավորության սկզբնական շրջանում, որպես կանոն, նա ի վիճակի էր կաղմակերպելու ոչ մեծ մասշտաբի արշավանքներ, այն էլ միևնույն ուղղությամբ, ապա հետագայում հնարավոր է դառնում մի շարք, ըստ որում տարբեր ուղղություններով, արշավանքների կաղմակերպումը: Այդ տե-

²⁶ Խորիսորյան տարեգրություն, V սյունակ, տող 70—81 և VI սյունակ, տող 1—7: Տե՛ս նաև տարեգրության այդ հատվածի կրկնագրի մի մասը — YKH, 128A4, տող 16—26: Ուրմեն, հավանաբար, համապատասխանում է ասորեստանյան աղբյուրների Շուպրիային կամ նրա մի մասին: Ուրարտական աղբյուրների Ուրմեի և ասորեստանյան աղբյուրների Շուպրիայի Կուլմե-րին (Կուլիմմերին) արտահայտում են միևնույն քաղաքի անունը: Ուրարտական Ուրմեի տեղադրումը հաստատվում է Մուշում և նրա շրջանում (Տրմերդ) հայտնաբերված Մենուայի արձանագրություններով (ՆՔԻ, 40, 41):

²⁷ «Всемирная история», I, էջ 541:

սակետից քաղաքական իրադարձություններով առանձնապես հարուստ են Արգիշտի I-ի թագավորության XI—XIII տարիները, երբ տարբեր ուղղություններով ձեռնարկվող արշավանքները դառնում են շատ սովորական և օրինաշատ երևույթ։ Այդ փաստը կարելի է բացատրել հետևյալ կարևոր հանգամանքներով։

Մեր առջև իր ամբողջ հասակով, մի կողմից, ծառայում է Ուրարտուի անախրնթաց ռազմական հզորության հարցը, երբ նրա ուժերը միանգամայն բավարարում էին միևնույն տարում ռազմական արշավանքներ ձեռնարկելու տարբեր ուղղություններով՝ դեպի հարավ-արևելք և հյուսիս, իսկ մյուս կողմից՝ Ուրարտուի երբեմնի ոչ այնքան ուժեղ ախոյանների տարեցտարի աճող ռազմական հզորության հարցը։

Այսպիսով, Արգիշտի I-ի թագավորության օրոք Ուրարտուն հասել էր իր հզորության գագաթնակետին։ Նրա ազդեցության սահմանները տարածվում էին հարավից մինչև Ասորեստան, հարավ-արևելքից՝ մինչև Բաբելոն (Դիալայի միջին հոսանքը), արևելքից՝ մինչև Ուրմիա լճի հյուսիսային և արևելյան ափերը, արևմուտքից և հարավ-արևմուտքից՝ Եփրատի վերին ու միջին հոսանքների աջափնյա տերիտորիաները (ընդհուպ մինչև Հյուսիսային Ասորիք), իսկ հյուսիսից՝ մինչև Ճորոխի ավազանը, Չալդեր լճից դեպի հյուսիս ընկած շրջանները և Սևանա լճի հյուսիս-արևմտյան սփերը։

* * *

Սարգուրյան տարեգրության մեղ հասած հատվածների ուսումնասիրությունը պարզորոշ կերպով ցույց է տալիս, որ Ուրարտուն շարունակում է պահպանել իր առաջնությունը Հին Արևելքում նաև Սարգուրի II-ի թագավորության ժամանակաշրջանում, համեմատյալ դեպս մինչև մ. թ. ա. VIII դարի 40-ական թթ. վերջերը։

Սարգուրի II-ը ստանձնում է արքայական գահը Ուրարտուի ներսում առկա բարդ իրադրության պայմաններում։ Նրա տարեգրության հենց առաջին տարին (մ. թ. ա. 764 թ.) ահադանգում է ներքին երկպառակությունների՝ մի շարք մարզերի կառավարիչների ընդհանուր բռնությունների կենտրոնական իշխանության դեմ ձեռնարկված խժոժությունների մասին։ Սարգուրի II-ը, սակայն, ամենայն դաժանությամբ ճնշում է այդ ընդվզումները և զգալի քանակությամբ հարստություն բռնագրավում կամ հարկեր նշանակում խռովության կազմակերպիչների վրա²⁸։ Ի դեպ որոշ նոր տվյալներ վկայում են, որ նմանօրինակ ներքին ընդվզումներ տեղի են ունեցել նաև Վանի թագավորու-

²⁸ Այդ իրադարձությունների մասին տե՛ս M. Tseretheli, Die neuen haldischen Inschriften König Sardurs von Urartu, Heidelberg, 1928, էջ 24—25, սյունակ G, տող 1—13։ Հիշատակված տեքստի մեկնաբանության վերաբերյալ տե՛ս Н. В. Арутюнян, Земледелие и скотоводство Урарту, Ереван, 1964, էջ 62 և էջ 159, ծանոթ. 120։ Հմմտ. Գ. Ա. Մելիքիշվիլու կարծիքը, ըստ որի այստեղ արձանագրված է Ուրարտուի որոշակի խավերի վրա նախկինում նշանակված պետական պարտավորությունների գիծումների մասին (УКН, 155, սյունակ G, ծանոթ. 9)։ Այդ կարծիքը հիմնականում պաշտպանում է նաև Ի. Մ. Գյակոնովը, տե՛ս И. М. Дьяконов, Урартские письма и документы М.—Л., 1963, էջ 53, ծանոթ. 137։

թյան ծայրամասային մարզերում, մասնավորապես Աղա հրկրում՝ Արարատյան դաշտավայրում, Արաքսի ձախափնյա հատվածում²⁹։

Երկրի ներքին դրուժյան կարգավորումը Սարգուրի II-ին հնարավորություններ է ընձեռում զբաղվելու նաև արտաքին քաղաքականության հարգերով։ Ներքին պառակտումների հետևանքով, որոշ երկրների, հավանաբար, հաջողվել էր թոթափել Վանի թագավորության լուծը։ Պատահական չէ, որ Եփրատի վերին հոսանքի աջափնյա հատվածում գտնվող Մելիտեան (Մալաթիան) և մի շարք այլ երկրներ, որոնք Ուրարտուի տիրապետությանն էին ենթարկվել ղեռն Արգիշտի I-ի օրոք (մ. թ. ա. 783 թ.), այժմ կրկին դառնում են Սարգուրի II-ի արշավանքի ասպարեզ։ Նա հիմնովին ավերում է Մելիտեան և ըզզալի քանակությամբ ավար տանում, այդ թվում ոսկի, արծաթ, անասունների հոտեր, ներումն շնորհելով սակայն, նրա թագավոր Խիլարուդային՝ հետագայում սիստեմատիկաբար հարկ վճարելու պայմանով³⁰։

Արևմուտքում ձեռք բերած հաջողությունները Սարգուրի II-ին հնարավորություն են տալիս Ուրարտուի սահմանները ընդլայնելու նաև այլ ուղղություններով։ Ուստի նա ռազմական արշավանք է ձեռնարկում դեպի Ռիխիշա երկիրը, հուրա քաղաքը և այլն³¹, այսինքն՝ դեպի Հյուսիսային Միջագետքի հարավ-արևմտյան շրջանները³², որտեղ ձեռք է բերում հարուստ ռազմական ավար։

Ուրարտուի հաջողությունները Միջագետքում, անկասկած, պայմանավորված էին ոչ միայն նրա ռազմական հզորության աճով, այլև Ասորեստանի թուլությամբ։ Դրա հիմնական պատճառը մ. թ. ա. 762—759 թթ. Ասորեստանում ու նրան ենթակա մարզերում ու քաղաքներում (Աշշուր, Արրապխա, Գուղանա) բռնկված ապստամբություններն էին, որոնց մասին վկայում են Ասորեստանյան փոխարքա-էպոնիմների ցուցակները³³։ Իրան հաջորդող ժամանակաշրջանում Ասորեստանը որոշ չափով ուշքի է գալիս և կրկին փորձեր ձեռնարկում իր դիրքերը ամրապնդելու հարցի (Եփրատի վտակի) վերին հոսանքներում (Գուղանա) և Ասորիքում (Խատարիկա, Արսլաղ)։ Սակայն դրանք մասնակի հաջողություններ էին և չեն կարող դիտվել որպես ուրարտական էքսպանսիային արժանի հակահարված։ Սարգուրի II-ը աստիճանաբար ավելի ու ավելի էր մոտենում բուն Ասորեստանի սահմաններին։

VIII դարի 50-ական թթ. Ուրարտուն շոշափելի հաջողություններ է ձեռք բերել նաև հարավում՝ նվաճելով Արմենիա³⁴ երկիրը և ապա մ. թ. ա. 753 կամ 752 թ. հաղթանակ տարել Ասորեստանի թագավոր Աշշուրներարի VI-ի (753—746 թթ. մ. թ. ա.) դեմ³⁵։

²⁹ Н. В. Арутюнян, Новая урартская надпись из Давти-блур, ВДИ, 1966, № 3, էջ 97, 104.

³⁰ Տե՛ս Սարգուրյան տարեգրություն, ՄԿՈ, 156BI, տող 12—31 և Իզդուրի արձանագրություն — ՄԿՈ, 158, տող 1—31.

³¹ ՄԿՈ, 156C, տող 1—30։ Տեքստը ունի զգալի չափով տուժած մասեր, ուստի այս արշավանքին վերաբերող շատ հարցեր ղեռն անհայտ են մնում ուրարտագիտությանը.

³² Г. А. Меликишвили, Нагри-Урарту, Тбилиси, 1954, էջ 248.

³³ Н. М. Дьяконов, АВИНУ, 39.

³⁴ Ք. Ա. "ափանցյանի կարծիքով Արմեն երկիրը կարելի է տեղադրել Վանա լճից դեպի հարավ-արևմուտք՝ ժամանակակից Արկանա, դեռակի (Ջերենե-սուի վտակը) շրջանում։ Տե՛ս Г. А. Капанцян, Хайаса—колыбель армян, Երևան, 1948, էջ 191—193 և բարեկցող այդ գրքի վերջում։

³⁵ ՄԿՈ, 156 DI, տող 1—13, DII, տող 21—29.

Ասորեստանի դեմ տարած հաղթանակը, բնականաբար, ոգևորում է Սարգուրի II-ին և նա շուտով (մ. թ. ա. 751 կամ 750 թթ.) ռազմական արշավանք է ձեռնարկում հարավ-արևելյան ուղղությամբ՝ Ուրմիա լճի հարավային ափերից մինչև Դիսուլայի միջին հոսանքը, որի ընթացքում նրան հաջողվում է հպատակեցնել Մանա, Բարուտա և Բարիլու երկրները³⁶։ Ինչպես և Ասորեստանը ի վիճակի չէր օգնության ձեռք պարզել իր անմիջական հպատակներին։

Շատ կարևոր է Սարգուրի II-ի մ. թ. ա. 751 կամ 750 թթ. ձեռնարկած նրվաճումների նշանակությունը Ուրարտուի ռազմա-քաղաքական պատմության համար, եթե նկատի ունենանք, որ այդ սոսկ երկրորդ դեպքն էր (Արգիշտի I-ի թագավորության վեցերորդ տարվա իրադարձություններից հետո), երբ Ուրարտուն նվաճում էր այդպիսի հեռավոր տերիտորիաներ։ Հետագայում ոչ ինքը՝ Սարգուրի II-ը, և ոչ էլ, մանավանդ, նրա հաջորդները այլևս փորձ չեն անում զբաղվելու Բաբելոնի և Բարուտայի նվաճման հարցերով, քանի որ նրանց ետևում նորից բարձրանում է ահեղ Ասորեստանը։

Միևնույն ժամանակ Սարգուրի II-ը զգալի հաղթանակներ է տանում նաև հյուսիսում, ուր նա հպատակեցնում է էթիունիի ցեղային միությունը, ապա Սևանա լճի հյուսիս-արևմտյան ափերին ներխուժում Իշտիկունի քաղաքի երկիրը։ Սրանով նա ամրապնդում է նախորդ տարվա հաջողությունները, որոնք ձեռք էին բերվել դեպի Սևանա լճի հարավային ափերը ձեռնարկված արշավանքի ժամանակ, որի ընթացքում ուրարտական զորքը հաղթականորեն անցել էր Սևանա լճի ողջ արևմտյան ափի երկայնքով, նվաճել Ուելիկուխի երկիրը և, այնուհետև, նրա հարավ-արևմտյան ափին հավանակ տարել Լուեխու ցեղի արքա Մինալիբիի, իսկ հարավային ափին՝ Արկուկինի երկրի դեմ (հասնելով մինչև Ուրտեխինի)³⁷։

Կարևոր է նշել, որ եթե Արգիշտի I-ի արշավանքների մարշրուտը դեպի Սևանի ավազանը ընթանում է հարավից՝ Արարատյան դաշտավայրից (Երեվան-Սևան երթուղիով՝ Ուլուանի և Կիեխունի երկրների միջով), ապա Սարգուրի II-ը մուտք է գործում Սևանա լճի հյուսիս-արևմտյան ափերը արևմուտքից (էթիունի երկրից)։ Հետևաբար, Սևանի ավազանի հարուստ անասնապահական շրջանները Սարգուրի II-ի թագավորության օրոք արդեն երկու կողմերից առնվել էին ամուր արքանի մեջ, որի շնորհիվ երկար ժամանակ ապահովվում է Ուրարտուի տիրապետությունը այդ խիստ շահավետ տերիտորիաներում։

Մ. թ. ա. 751 կամ 750 թ. երրորդ արշավանքի իրադարձությունները տեղի են ունենում Վանա լճից դեպի արևմուտք ընկած Ուրմե երկրի տերիտորիայում³⁸, որտեղ Սարգուրի II-ը նվաճում ու ավերում է 11 ամրոցներ, վերցնում զգալի թվով ռազմագերիներ և խոշոր ու մանր եղջերավոր անասուններ³⁹։

³⁶ УКН, 155А, տող 1—12; Բարուտան, հավանաբար, համապատասխանում է ասորեստանյան աղբյուրների Բարու, Բիտ-Բարուային, իսկ Բաբիլուն՝ սամրուին, որն այդ ժամանակ բնակություն էր կուտորայով ուժեղ չափով ենթարկվել էր Բաբելոնի ազդեցությանը։ Sб'а 11. М. Дьяконов, АВНУ, 28, ծանոթ. 20։

³⁷ М. В. Никольский, Клинообразные надписи Закавказья, МАК-V, 1896, XV, XVI; Г. А. Меликишвили, УКН, 160, 161։

³⁸ Ուրարտական Ուրմե, ըստ երևույթի, մոտավորապես համընկնում է պատմական Տարոնին։

³⁹ Г. А. Меликишвили, УКН, 155А, տող 22—25։

Հետադադում, մ. թ. ա. 750—748 թթ. միջև ընկած ժամանակամիջոցում Սարգուրի II-ը որոշ քայլեր է ձեռնարկում իր պետության սահմանները ընդլայնելու հյուսիսում և ծայրագույն հյուսիս-արևմուտքում: Հյուսիսում, Արաքսի վերին հոսանքում, նա նվաճում է Արիլիանին (հայկական Արեղեանք), իսկ հյուսիս-արևմուտքում՝ Կուլխան (վրացական Կուխիդան) և Խուշանին՝ Ի դեպ, Խուշանի և Արիլիանի երկրներում ղեռնա մ. թ. ա. 785—784 թթ. եղել էր Արգիշտի I-ը⁴¹, իսկ ինչ վերաբերում է Կուլխանին, որի հյուսիսային սահմանները հարում էին Սև ծովի հարավ-արևելյան ափերին, ապա Ուրարտուի ամբողջ պատմության ընթացքում միայն Սարգուրի II-ին է հաջողվել երկու անգամ լինելու այդ ծայրամասային երկրում:

Այնուհետև Սարգուրի II-ը արշավանք է ձեռնարկում դեպի էրիախի երկիրը (պատմական Շիրակ), նվաճում Նրա հարուստ շտեմաքանները և անասունների ամբողջական հոսերը բշում դեպի Բիսյնիլի-Ուրարտու⁴²: Վերադարձին նա հաշվեհարդար է տեսնում ղեռնա նախորդ տարում նվաճված Արիլիանի (Արեղեանք) թագավոր Մուրինի հետ⁴³, որը, ըստ երևույթին, փորձել էր շենթարկվել Ուրարտուի կենտրոնական իշխանությանը: Արիլիանի քաղաքները հրկիզվում են, երկիրը՝ ավերվում: Ուրարտական թագավորը ներողամտություն է ցուցաբերում նրա թագավոր Մուրինի նկատմամբ՝ առաջիկայում անտրտունջ ենթարկվելու և հարկ վճարելու պայմանով: Նմանորինակ դեպք, ակներևաբար, տեղի է ունեցել նաև էթիունի կապակցությամբ, որի լայնատարած տերիտորիան Սարգուրի II-ը «նվաճեց» հաջորդ տարում⁴⁴, այն դեպքում, երբ այդ ցեղային միությունը ենթարկվել էր ուրարտական տիրապետությանը ղեռնա երկու-երեք տարի առաջ:

Հյուսիսային երկրների նկատմամբ տարած զգալի թվով հաղթանակները տարեցտարի ամրապնդում են Ուրարտուի ռազմական հզորությունը: Ընդհատ է նա ղեռնա համարձակություն չի ցուցաբերում առաջվա նման ոտնձգություններ անելու Ասորեստանի կամ նրան ենթակա երկրների նկատմամբ, սակայն հուժկու ռազմական արշավանք է ձեռնարկում դեպի հեռու արևելք՝ Պարսկաստանի հյուսիսային լեռնային շրջաններում ընկած Արասբարան կամ Կարսյադաղ մարզում տեղադրվող Պուլուաղի երկիրը: Ուրարտական ղորքը, հարկավոր դիմադրության է հանդիպում այս երկրում, սակայն Սարգուրի II-ին հաջողվում է ձնշել այն և հաղթանակի հասնել: Ուրարտական թագավորը ավերում է երկիրը, հրկիզում քաղաքները և վերցնում բազում ռազմագերիներ: Նա կցում է Պուլուաղին իր երկրի սահմաններին, տեղում կառուցում պաշտպանական

40 Սարգուրյան տարեգրության տվյալներից կարծեք թե երևում է, որ Խուշանին այդ ժամանակ ընդգրկված էր Կուլխանի տերիտորիալ սահմանների մեջ: Տե՛ս YKH, 155C, տող 1—10:

41 Տե՛ս YKH, 127, 1 սյունակ, տող 8, ինչպես նաև Խորխորյան տարեգրության այդ հատվածի կրկնագիրը (YKH, 128B1, տող 2):

42 YKH, 155C, տող 25—34: Էրիախին երկու անգամ նվաճման օրյեկտ է հանդիսացել նաև Արգիշտի I-ի թագավորության օրոք: Տե՛ս Խորխորյան տարեգրություն, II և XIII տարիների տրվյալները:

43 YKH, 155C, տող 34—39:

44 Տե՛ս YKH, 155C, տող 49—52: Տվյալ տարում նվաճվում է նաև Ռուիշիանի երկիրը, որի տեղադրումը, սակայն, հնարավոր չէ պարզել:

բնույթի ամրոցներ և կանգնեցնում սեպագիր քարակոթող՝ ի նշան այդ կարևոր հաղթանակի⁴⁵։

Սակայն թիգլատպալասար III-ի ձեռնարկած ուժեղացումները ղգալի չափով վերականգնում են Ասորեստանի հզորությունը⁴⁶ և նա կրկին փորձեր է անում ապահովելու իր առաջնությունը Առաջավոր Ասիայում։ Մյուս կողմից, Վանի թագավորությունը ևս ամենևին մտադիր չէր առանց պայքարի Ասորեստանին դիմելու իր առաջնությունը։ Ահա թե ինչու ստեղծելով արևմուտքում ուժեղ կուլիցիա, որի մեջ ընդգրկվեցին Բիտ-Ագուսի⁴⁷ Մատիել, Մելիդի⁴⁸ Սուլումալ, Գուրգուլի Տարխուլարա և Կումմուխի Կուշտաշպի⁴⁹ թագավորները, Սարգուրի II-ը միացյալ ուժերով հարձակման անցավ Ասորեստանի դեմ։ Ճակատամարտում, որ տեղի ունեցավ մ. թ. ա. 743 թ. Հյուսիսային Ասորիքում, Ուրարտուի և նրա դաշնակիցների զորքերը հախչախիչ պարտություն կրեցին⁵⁰։ Իր կյանքը փրկելու համար ուրարտական թագավորը ստիպված էր գիշերը փախուստի դիմելու։ Թիգլատպալասարը հետապնդում է նրան մինչև «Եփրատի վրա անցկացված կամուրջը՝ Ուրարտուի սահմանը»։ Այնուհետև, թիգլատպալասարի տարեգրությունը նկարագրում է Ուրարտուի մի շարք բնակատեղիների նվաճումը հայկական Տավրոսում⁵¹։

Ճակատագրական այդ պարտությունից հետո Ուրարտուն երկար ժամանակ այլևս չի կարողանում փոքրիշատե ուշքի գալ։ Այնուհետև սոսկ մի անգամ Սարգուրի II-ին տեսնում ենք հարավ-արևելքում՝ Մերձուրմյան Մանա երկրում⁵²։ Մնացած բոլոր դեպքերում նա իսպառ հրաժարվում է Ասորեստանի և նրան ենթակա կամ աղղկություն ունեցող բնակիչների նկատմամբ տերիտորիալ ակնկալություններից և գերադասում է իր տիրապետությունը ամրապնդել հյուսիսային երկրներում։ Այժմ (մ. թ. ա. VIII դարի 40-ական թթ. վերջերին) Սարգուրի II-ը երևում է մերթ մեծովի հարավ-արևելյան ափերի մոտերքում (Կուլխա), մերթ Արաքսի վերին հոսանքում (Արիլիանի, Աբունի⁵³,

⁴⁵ YKH, 155E, տող 1—18։ Սարգուրի II-ի Գուլուագիում թողած արձանագրությունը հայտնաբերվել է ավելի քան մեկ տասնամյակ առաջ։ Տե՛ս M o h a m m a d J a v a d M a s h k u r, Urartu inscription in Iranian Azerbaijan, Tehran, 1955։ Արձանագրության վերձանությունը տվել է Գ. Ա. Մելիքիշվիլին—БДН, 1960, № 3, էջ 3—11, YKH, էջ 453—454 (№ 13)։ Այդ տարում Սարգուրի II-ը արշավանք է ձեռնարկում նաև դեպի հյուսիս-ուր կրկին իր տիրապետությանն է ենթարկում Էրիախի երկիրը։

⁴⁶ Н. М. Дьяконов, Развитие земельных отношений в Ассирии, Л., 1949, էջ 89—90։

⁴⁷ Թագավորություն Հյուսիսային Ասորիքում՝ Արպազ (այժմյան Տել էրֆադ) կենտրոնական քաղաքով։

⁴⁸ Ուրարտական Մելիտեա, անտիկ աղբյուրների Մելիտենա, հայկական Մալաթիա։

⁴⁹ Ասորեստանյան Կումմուխի համապատասխանում է ուրարտական Կումախային և անտիկ աղբյուրների Կոմմագենային։ Կումմուխի թագավոր Կուշտաշպին հիշատակվում է նաև սարգուրյան տարեգրության մեջ «Կուշտաշպիի» ձևով (տե՛ս սյունակ E, տող 41)։

⁵⁰ Տե՛ս ասորեստանյան փոխարքա-Լպոնիմների ցուցակները (ABHUY, 39) և Թիգլատպալասար III-ի տարեգրության 59—82 տողերը (P. Rost, Die Keilschrifttexte Tiglat-Pileasers III, Leipzig, 1893)։

⁵¹ ABHUY, 41 (59, 67, 83, 176)։

⁵² Սարգուրյան տարեգրություն, սյունակ B, տող 15—26։

⁵³ Համապատասխանում է պատմական Հաֆուսիքին։ Տե՛ս Н. В. Арутюнян, Заметки по урартской эпиграфике, ЗУՄ ԳԱ «Տեղեկագիր» (հաս. փա.), 1957, № 12, էջ 70—74։

Ուխտերուխի), մերթ Զալդոր լճի հարավային ափերին (Իգա), մերթ Լի սկսած Կարսի մարզից մինչև Սևանա լճի հարավային ափերին հարող լայնատարած տերիտորիաներում (Էթունի, Ուղուրի-էթունի)⁵⁴։

Այնուհետև, շուրջ 4—5 տարի Ուրարտուի քաղաքական պատմության մասին քիչ բան է հայտնի, Ասորեստանյան փոխարքա-Լպոնիմների ցուցակներից և Թիզլատպալասար III-ի արձանագրություններից իրազեկ ենք, որ մ. թ. ա. 735 թ., այսինքն՝ Սարգուրի II-ի տիրապետության մայրամուտին, Ասորեստանը ռազմական արշավանք է ձեռնարկել Ուրարտուի դեմ, որն ավարտվել է վերջինիս պարտությամբ Կուժմուխում։ Սարգուրի II-ը ստիպված է լինում թաքնվելու Տուշպայում, որից հետո ասորեստանյան զորքը անկաշկանդ 60 բերու, այսինքն՝ ավելի քան 400 կմ յորենթաց արշավում է Ուրարտուի տերիտորիայով և նվաճում ու կցում Ասորեստանի սահմաններին Վանա լճից հարավ-արևմուտք և հարավ ընկած մի շարք երկրներ (Ուլուբա, Խարխի, Էնդի)⁵⁵։

Այսպիսով, Սարգուրի II-ի օրոք Ուրարտուի ազդեցության սահմանները ժամանակ առ ժամանակ հասել են մինչև Ասորեստան (հարավում), Հյուսիսային Ասորիք (հարավ-արևմուտքում), Դիալայի վերին ու միջին հոսանքները (հարավ-արևելքում), Եփրատի աջափնյա տերիտորիաները (արևմուտքում), Սև ծովի հարավ-արևելյան ափերը (հյուսիս-արևմուտքում), Զալդոր լճի հարավային ափերը (հյուսիսում), Սևանա լճի արևմտյան ու հարավային ափերը (հյուսիս-արևելքում) և Իրանական Ադրբեջանի հյուսիսային լեռնային շրջանները (արևելքում)։ Ուրարտուի առաջնությունը պատմական թատերաբեմում շարունակել է պահպանվել Սարգուրի II-ի թագավորության մի զգալի հատվածում, որը հարատևում է ավելի քան երկու տասնամյակ (մ. թ. ա. 764—742 թթ.)։ Մ. թ. ա. 743 և 735 թթ. Թիզլատպալասար III-ից կրած պարտությունից հետո միայն Ուրարտուի դիրքերը նկատելիորեն խաթալվում են արևմուտքում, հարավ-արևմուտքում, հարավում ու հարավ-արևելքում, բայց լրիվ պահպանվում են հյուսիսում։

Ուրարտուի անհաջողությունները Ասորեստանի դեմ վարած կատաղի մարտերում թուլացրել էին կամ ի չիք դարձրել նրա դիրքերը ոչ միայն հարավում՝ Ասորեստանին սահմանակից կամ ժամանակ առ ժամանակ նրա ազդեցության ոլորտում եղած երկրներում, այլև հյուսիսում՝ այդ թվում Սևանա լճի ավազանում։ Այդ իսկ պատճառով Խուսա I-ը ստիպված էր այստեղ անհրաժեշտ ջանքեր գործադրել մի կողմից կրկին ամրապնդելու իր դիրքերը նախկինում Ուրարտուին ենթակա մարզերում, մյուս կողմից՝ շարունակելու իր նախորդների քաղաքականությունը՝ երկրի տերիտորիան ընդարձակելու ուղղությամբ։

Իր թագավորության սկզբնական շրջանում Խուսա I-ը, հավանաբար, զերպանցաբար զբաղվել է երկրի ներքին գործերի կարգավորումով։ Կարծում են, օրինակ, որ թագավորական իշխանությունը ուժեղացնելու նպատակով նա, Թիզլատպալասար III-ի նմանողությամբ, մանրատել է փոխարքայությունները

⁵⁴ Տե՛ս Սարգուրյան տարեգրություն, սյունակ B, տող 26—35, D, տող 1—30, 45—53, F, տող 1—28, ինչպես նաև ՅԿՈ, 159, 160, 165 և այլն։

⁵⁵ АВНУ, 39 և 42, 43, 44, 45.

և, այդպիսով, սահմանափակել նրանց իրավունքները⁵⁶։ Այնուհետև, ուրարտագիտության մեջ իշխում է այն տեսակետը, ըստ որի Ուրարտուի մայրաքաղաքի տեղափոխումը Տուշպայից (Վանից) Ռուսախինի (Քոփրախ-կալե) տեղի է ունեցել հենց Ռուսա I-ի օրոք։ Ըստ երևույթին, այդ օրակարգի հարց էր դարձել Քիզլատպալասարի կողմից Տուշպային պատճառած զգալի ավերածություններից հետո⁵⁷։ Ի դեպ, Ռուսա I-ի անվան հետ է կապվում Վանից շուրջ 25 կմ դեպի արևելք ընկած արհեստական լճից մինչև Ուրարտուի «նոր» մայրաքաղաքը⁵⁸ անցկացված ջրանցքը, որի ռեսուրսների շնորհիվ այստեղ հիմնվում են խաղողի այգիներ, ցանքադաշտեր և այլ տնտեսություններ⁵⁹։

Ինչ վերաբերում է ռազմական հզորությանը, ապա այդ տեսակետից Ռուսա I-ի օրոք Ուրարտուն, իհարկե, ալևս այն չէր, ինչ մենք նրան տեսանք սկսած Արգիշտի I-ի թագավորության սկզբներից (մ. թ. ա. 783 թ.) ընդհուպ մինչև Սարգուրի II-ի տիրապետության վերջին շրջանը (մ. թ. ա. 742 թ.), երբ Վանի թագավորությունը հիմնավորապես չեղոքացրել էր Ասորեստանին և ապահովել իր առաջնությունը Առաջավոր Ասիայում։ Սակայն այժմ էլ Ուրարտուն դեռևս ջանում էր պահպանել իր հավասարակշռությունը առկա բարդ քաղաքական իրադրության մեջ և նույնիսկ երբեմն ընդվզում Ասորեստանի դեմ։

Մ. թ. ա. VIII դարի 30-ական թթ. երկրորդ կեսին և 20-ական թթ. սկզբներին, երբ Ասորեստանում դեռ շարունակում էր թագավորել Քիզլատպալասար III-ը, Ռուսա I-ին, ըստ երևույթին, այլ բան չէր վիճակված, քան եթե խելացիորեն ցնահատել ստեղծված իրադրությունը և ձեռնպահ մնալ Ասորեստանի արմատական շահերը շոշափելուց հարավում և այլուր։ Սակայն, մյուս կողմից, Ուրարտուն այդ ժամանակ նվաճողական գործողություններ ձեռնարկելու հնարավորություններ ուներ հյուսիսում, ուր նա գործ ուներ անհամեմատ ավելի թույլ հակառակորդների հետ։ Ահա թե ինչու այստեղ, Սևանա լճի ավազանում, Ռուսա I-ը ջանում էր ոչ միայն ամրապնդելու Ուրարտուի նախկին դիրքերը, այլև նվաճելու մի ամբողջ շարք նոր երկրներ։ Լճի արևմտյան և հարավային ափերին նա կրկին հնազանդեցնում է Սեպիստի, Ունիկու(խի) կամ Ունիկու(նի), Լուերու(խի) և Արկուկինի երկրները, որոնք Ուրարտուի տիրապետությանն էին ենթարկվել դեռևս Սարգուրի II-ի թագավորության օրոք, իսկ, այնուհետև, հպատակեցնում «լճից այն կողմ», բարձրագիծ լեռներում ընկած թրվով 19 այլ երկրներ⁶⁰։

Ասորեստանի ուժեղացմանը զուգընթաց, բնականաբար, Ռուսա I-ի ուշադրությունը տարեցտարի ավելի ու ավելի էր սրվում Սևանի ավազանի հարուստ անասնապահական տերիտորիաների նկատմամբ։ Հարավում կրած ըզզալի կորուստների դիմաց նա աշխատում էր ինչ-որ չափով փոխհատուցում գտնել հյուսիսում։ Ծովինարի արձանագրության որոշ տվյալներից երևում է, որ ուրարտական թագավորը սխտեմատիկաբար լինում էր Սևանի ավազանի նը-

⁵⁶ Б. Б. Пиотровский, Ванское царство (Урарту), Москва, 1959, էջ 88, 92;

⁵⁷ նույն տեղում;

⁵⁸ Ռուսախինի-Քոփրախ-կալեն ընկած է Տուշպա-Վանի հյուսիս-արևելյան ծայրամասում;

⁵⁹ Այդ մասին մանրամասն տե՛ս Н. В. Арутюнян, Земледелие и скотоводство Урарту, Երևան, 1964, էջ 24—28, 33—38 և այլն;

⁶⁰ Այդ մասին տե՛ս Ռուսա I-ի Նոր-Բայազետի (Կամո) և Ծովինարի արձանագրությունները (УКН, 265, 266)։

վաճված երկրներում ոչ միայն հարկահանության, այլև պաշտպանական ամրոցներ կառուցելու նպատակով: Ռուսա I-ի հիմնադրած ամրոցների մնացորդներ հայտնաբերվել են Սևանա լճի արևմտյան ափերի մոտակայքում՝ Նոր-Բայազետ (այժմյան Կամո) քաղաքի վրա՝ դերիշխող սարահարթի վրա («Խալդի աստծո քաղաք») և հարավային ափին՝ Ալիշալու և Մովինար գյուղերի միջև («Քեյշերա աստծո քաղաք»)⁶¹: Այդ նշանակում է, որ Ուրարտուն մտադիր էր հիմնավորապես ամրապնդելու իր դիրքերը հիշյալ հեռավոր լեռնային շրջաններում: Շատ հավանական է, որ Ուրարտուի տիրապետությունը այստեղ ընդհանուր առմամբ հարատևած լինի եթե ոչ ալեկի, համենայն դեպս ընդհուպ մինչև Ռուսա I-ի թագավորության վախճանը:

Երկրի ներքին գրության կարգավորումը և հյուսիսում ձեռնարկված նվաճումները նկատելիորեն ամրապնդում են Ուրարտուի ռազմական հզորությունը և նա փոքրիշատե նախապատրաստված է զգում ուժերը կրկին շափելու Ասորեստանի հետ: Ռուսա I-ին այժմ առանձնապես հետաքրքրում էր հարավարևելյան ռազմա-ստրատեգիական և պաշտամունքային կենտրոն Արգինի-Մուսասիրը: Ի դեպ, մ. թ. ա. 727 թ. Ասորեստանում զահ է բարձրանում Սալմանասար V-ը, որի ուղադրության առարկան են դառնում ոչ թե Ուրարտուն, այլ երկրի ներքին գործերը, ինչպես նաև Բաբելոնը: Ներքին գործերում, օրինակ, Սալմանասար V-ը ալեկի շատ է հենվում բանակի վրա, քան իր նախորդը՝ Թիգլատպալասար III-ը: Նա քանքեր է գործադրում բռնությամբ ամրոցողիկն վերջ տալու ազնվականության և տաճարների արտոնություններին:

Այնուհետև, եթե Թիգլատպալասարը, իրեն ենթարկելով Բաբելոնը, այնուամենայնիվ պահպանեց նրա ինքնուրույնությունը, ապա Սալմանասար V-ը վերջ տվեց դրան: Վերացնելով արտոնությունները Աշշուրի տաճարներում, նա վերացնում է այն նաև Բաբելոնի սրբազան քաղաքներում՝ նիպպուրում, Սիպպարում և Բաբելոնում: Այդ պատճառով էլ Սալմանասար V-ի քաղաքականությունը մեծ դժգոհություն է առաջացնում ոչ միայն Ասորեստանում, այլև Բաբելոնում: Այդ դժգոհությունը, ի վերջո, հանգեցնում է դավադրության Ասորեստանի թագավորի դեմ: Դավադրությունը ալեկի ու ալեկի հասունանում է րսկըսած մ. թ. ա. 725 թ., երբ Սալմանասարը անընդհատ զբաղված էր Բսրայելի նվաճմամբ: Չնայած հենց մ. թ. ա. 725 թ. Բսրայելը ջախջախվում է և Ասորեստանյան զորքը մերձենում է անմատչելի լեռնային ամրոց Սամարիային՝ Բսրայելի մայրաքաղաքին, սակայն վերջինիս պաշարումը տևում է շուրջ երեք տարի, որի ընթացքում Ասորեստանյան բանակը տալիս է հսկայական զոհեր: Այդպիսի ծայր աստիճան լրացած պայմաններում էլ Ասորեստանում ծագում է ապստամբություն և Սալմանասար V-ի կյանքի դեմ տարիներ շարունակ հասունացող դավադրությունը մ. թ. ա. 722 թ. ի կատար է ածվում⁶²:

Ըստ երևույթին, Ասորեստանի համար ստեղծված այդ ծանր ժամանակներին են վերաբերում Ռուսա I-ի հարավում ունեցած որոշակի ռազմական հաջողությունները, որոնց մասին պատմում է Բուփուզավայի ասսուրա-ուրարտական երկրագրության արձանագրությունը: Սակայն այդ աղբյուրի համաձայն, Ռուսա I-ը ղեկս շարունակում է պահպանել իր դիրքերը անառիկ լեռներում՝ ընկած և անմատչելի անտառներով ծածկված, հետևաբար ստրատեգիական

⁶¹ Б. Б. Пиотровский, Ванское царство (Урарту), Москва, 1959, էջ 32.

⁶² В. В. Струве, История древнего Востока, էջ 327—328.

խոշոր նշանակություն ունեցող Արդինի-Մուսասիրում: Այստեղ ուրարտական թագավորը նախ ծավալում է պաշտամունքային բնույթի պանագան օրգնկոնների շինարարություն, այնուհետև իր բանակը համալրելով Սուսասիրի թագավոր Ուրվանայի տրամադրած օժանդակ զորքերով ու մարտակառքերով, շարժվում է դեպի «Ասորեստանի լեռները», ուր հսկայական կոտորածներ է պատճառում: Իր այդ հաղթանակի պատվին Խուսան Մուսասիրում պահեր է մատուցում և տոնակատարություն կազմակերպում լեռի բնակիչների համար⁶³:

Սակայն առաջավոր Ասիայի քաղաքական պատմության մեջ շրջադարձային փոփոխություններ են տեղի ունենում, երբ Ասորեստանում գահ է բարձրանում Սարգոն II-ը: Երկրի ներսում, ի տարբերություն իր նախորդների, նա վերականգնում է ազնվականության ու տաճարների արտոնությունները, բանակում սահմանափակում ընչազորակների թիվը և դրա փոխարեն նրանում ընդգրկում նվաճված երկրների զորքերից, պահում է նաև վարձկան զորք: Այս բոլորը ապահովում են Սարգոնի առաջիկա հաջողությունները ներքին և արտաքին քաղաքականության մեջ: Իր թագավորության հենց առաջին տարում Սարգոն II-ը հեռու արևմուտքում նվաճում է Սամարիան՝ Իսրայելի մայրաքաղաքը, մի բան, որ չհաջողվեց Սալմանասար V-ին և փաստորեն պատճառ դարձավ նրա ողբերգական վախճանի: Այնուհետև, ասորեստանյան թագավորը նվաճում է Պաղեստինի ժովափնյա քաղաքները, իսկ ամենահուժեղ հարվածները խնամքով նախապատրաստում դեպի հյուսիս՝ Ուրարտուի դեմ:

Նախքան վճռական ճակատամարտերին անցնելը, Սարգոնը զգալի ժամանակ է հատկացնում Ուրարտուի ներքին վիճակի համբերատար ուսումնասիրությանը: Այդ նպատակով նա սխտեմատիկաբար հետախույզներ է ուղարկում Ուրարտուի տերիտորիան: Սարգոնի գաղտնի միջամտությունը Վանի թագավորության ներքին գործերին՝ աստիճանաբար խարխլում է վերջինիս հիմքերը: Կենտրոնական իշխանության դեմ ոտքի են կանգնում բազմաթիվ զրթ-զոհ տարրեր, այդ թվում մարդսլան կառավարիչներ, բարձրաստիճան գինավորական պաշտոնյաներ և այլն⁶⁴:

Հետախույզական նամակներից մեկը ակնարկում է, որ Ուրարտուի ներքին երկպառակությունները թուլացրել էին նրա դիրքերը որոշ երկրներում, այդ թվում Մանայում, ուր, ըստ երևույթին, հակված էին թոթափելու Վանի թագավորության ծանր լուծը⁶⁵:

Սարգոնի ժամանակվա հետախույզական նամակները, մյուս կողմից, վկայում են Վանի թագավորության և կիմմերների միջև տեղի ունեցած առաջին ռազմական ընդհարումների մասին⁶⁶:

Հետախույզների հաղորդումներից հստակ երևում է, որ առաջմ Ուրարտուի ենթակայության տակ են գտնվում ոչ միայն Վանա լճից հարավ բնակած

⁶³ M. de Tseretheli, Etudes ourartiennes (III. La stèle de Sidikan-Topzaoua), RA, № 4, vol. XLIV, 1950, էջ 183—192. Г. А. Мелникшвили, УЖН, 264.

⁶⁴ В. В. Струве, История древнего Востока, էջ 328—329. «Всемирная история», I, էջ 546.

⁶⁵ L. Waterman, Royal Correspondence of the Assyrian Empire, Ann Arbor, I—II (1930), III (1931), IV (1936) (այսուհետև հապաված՝ RCAE), № 444, 492, АВННУ, 50 (4, 9).

⁶⁶ RCAE, № 381. АВННУ, 50 (12).

⁶⁷ RCAE, № 197, 112, 146. АВННУ, 50 (10 8, 11).

խուրուչկիան, այլև է՛լ ավելի հարավ-արևելքի Արդինի-Մուսասիրը։ Նույնիսկ կիմմերներից կրած ծանր պարտությունից անմիջապես հետո նրանց կառավարիչները (ինչպես նաև Մուսասիրի կառավարիչի եղբայրն ու որդին) ղնում են ողջունելու ուրարտական թագավորին։ Դրան ականատես են լինում ուրարտա-ասորեստանյան սահմանի վրա գտնվող բոլոր ամրոցների կայազորները⁶⁸։

Սակայն Ուրարտուի անհաջողություններին զուգընթաց, նրանից աստիճանաբար երես է դարձնում և հակվում դեպի Ասորեստանը ռազմա-ստրատեգիական խոշոր նշանակություն ունեցող Արդինի-Մուսասիրը։ Այդ պարզորոշ երևում է նրա արքա Ուրդանայի՝ Սարգոն II-ին հասցեագրած նամակներից⁶⁹։

Եթե Ռուսային ոչ բոլոր դեպքերում է հաջողվում հնազանդության մեջ պահել իր թագավորության ծայրամասային, ատանձնապես հարավում եղած մարդերը, ապա կենտրոնական մարզերում ծագած աղյուսամբությունները նա շուտով ձնշում է և կարգ ու կանոն հաստատում երկրում։ Այդ մասին հետաքրքիր տվյալներ կան Աշշուրիսուայի հետախուզական նամակներում⁷⁰։

Բերված փաստերը վկայում են, որ Ռուսա I-ը հսկայական ջանքեր է գործադրել Վանի թագավորությունը ոչ միայն արտաքին ու ներքին վտանգներից զերծ պահելու, այլև կորսված մարզերը վերադարձնելու, իսկ որոշ դեպքերում էլ նոր տերիտորիաներ նվաճելու համար⁷¹։

Հետագա տարիներին ևս Սարգոն II-ը զգալի ջանքեր է գործադրում Ուրարտուի ներքին գործերին ակտիվ միջամտելու ուղղությամբ։ Սակայն Ռուսա I-ը ևս, իր կողմից, ամենեին էլ անգործություն չէր մատնված Ասորեստանից օրավուր սպասվող սպառնալիքի հանդեպ։ Մ. թ. ա. 719 թ. Ռուսային տեսնում ենք ռազմական դաշինքի մեջ Սուկկու, Բալս և Արիտիկնա⁷² քաղաքների հետ, որոնց բնակիչներից Սարգոն II-ը դաժան վրեժ է լուծում և վերաբնակեցնում ռարեմտյան երկիր հատուիս⁷³։

Այդ նույն ժամանակներում Ռուսան զգալի ջանքեր է գործադրում իր տիրապետությունը ապահովելու մերձուրմյան շրջանում։ Այստեղ, Ուրմիա լճից դեպի արևելք ընկած Զիկիրտուն ինքն է աշխատում բարի-դրացիական հարաբերություններ սահմանել Ուրարտուի հետ։ Իսկ ինչ վերաբերում է Մանային, ապա Ռուսան շարունակում է ռազմական ակտիվ գործողություններ ձեռնարկել բռնի ուժով այդ երկիրը իր տիրապետությանը ենթարկելու։ Այդ մասին հաղորդում է Աշշուրիսուայի մ. թ. ա. 719 թ. (?) թվագրվող նամակներից մեկը⁷⁴։

Հետագայում, մ. թ. ա. 716 թ., Ռուսան հրահրում է Սարգոնի և նրա դրածո՝ Մանայի թագավոր Աղայի դեմ վերջինիս ենթակա որոշ երկրների կառա-

⁶⁸ L. Waterman, RCAE, № 197. II. М. Дьяконов, ВВНУ, 50 (10).

⁶⁹ RCAE, № 409, 768. ВВНУ, 50 (2, 7).

⁷⁰ RCAE, № 197, 144, ВВНУ, 50 (10, 13).

⁷¹ Այս հարցերի մանրամասն հետազոտությունը տես՝ Б. Б. Пиотровский, Ванское царство (Урарту), էջ 87—101.

⁷² Այդ քաղաքների տեղագրումը պայմանավորված չէ։

⁷³ Ասորեստանյան աղբյուրների այդ ժամանակվա «հատուի երկիր» տակ սովորաբար պետք է հասկանալ Ասորիքը, Փյունիկիան և Պաղեստինը, ինչպես նաև Փոքր Ասիան։ «Հատուի երկիր» նեղ իմաստով կարելի է թագավորությունն էլ՝ Տե՛ս II. М. Дьяконов, ВВНУ, 46 (32) և ծանոթ. ։

⁷⁴ RCAE, № 198. ВВНУ, 50 (14).

վարիչների՝ Ուիշդիշի արքայ Բագդատաիին և Չիկիրտուի արքայ Միտատտիին⁷⁵։ Ռուսայի ակտիվ աջակցությամբ վերջիններիս հաջողվում է հաղթանակ տանել Մանայի դեմ՝ Ուաուշ լեռան վրա, որտեղ սպանվում է Աղան։ Սարգոնը վրա է հասնում և պարտության մատնում նրանց՝ Ուիշդիշի Բագդատտի արքային դաժան մահապատժի ենթարկելով՝ քերթելով նրա մաշկը։ Սակայն Ռուսան նոր գործողությունների է դիմում։ Այս անգամ նա գաղտնի կապերի մեջ է մտնում Մանայի նոր թագավոր Ուլլուսունուի հետ (որին Սարգոնն էր կարգել թագավոր՝ Աղայի մահից հետո), որի միջոցով Ասորեստանի դեմ է հրահրում Կալլուի և Ալլարբիայի⁷⁶ թագավորներին։ Սարգոնը հաղթանակ է տանում ինչպես այդ երկրների, այնպես էլ Մանայի նկատմամբ։ Մարտերի ընթացքում նա հրկիզում է Մանայի արքայանիստ քաղաք Իդիրսուն։ Ուլլուսունուն ստիպված անձնատուր է լինում և ներումն հայցում, որին և արժանանում է Սարգոնի կողմից⁷⁷։

Սակայն Ռուսան բնավ չի հաշտվում ստեղծված իրադրության հետ։ Կապերի մեջ մտնելով Մանայի երկրամասերից մեկի կառավարչի՝ Դայուկկուի հետ, Ռուսան մ. թ. ա. 715 թ. կարողանում է բռնագրավել Մանայի 22 ամրոցներ, սակայն Սարգոնը դրանք ետ է նվաճում և ընդգրկում Ասորեստանի սահմանների մեջ։ Ուրարտական թագավորից, միաժամանակ, որպես հարկ նա ստանում է խոշոր ու մանր եղջերավոր անասուններ⁷⁸։

Այսպիսով, Ռուսան տարիներ շարունակ գործում է Ասորեստանի դեմ և անհանգստություն պատճառում Սարգոն 11-ին՝ ժամանակ առ ժամանակ իր ազդեցության ոլորտի մեջ ներգրավելով Ասորեստանին ենթակա մի շարք երկրներ ու մարզեր։ Եվ ահա Սարգոնը իր թագավորության ութերորդ տարում, այսինքն՝ մ. թ. ա. 714 թ. ավերիչ արշավանք է ձեռնարկում Ուրարտուի դեմ⁷⁹։

Սարգոնի մ. թ. ա. 714 թ. արշավանքը ծայր աստիճանի ծանր կացության մեջ դրեց Ուրարտուին ոչ միայն քաղաքական, այլև տնտեսական ասպարեզում։ Նա զրկվեց մերձուրմյան շրջանի, Վանա լճից դեպի արևելք, հարավ և հարավ-արևելք ընկած մի շարք շախմատահան հարուստ երկրագործական և անասնապահական կենտրոններից։ Դա ոչ միայն Ռուսայի թագավորության փաստացի անկումն էր, այլև Ուրարտուի վայրէջքի սկիզբը։ Սարգոնի այդ արշավանքից հետո Ռուսա I-ը ընդամենը մեկ տարի է մնում ուրարտական գահի վրա⁸⁰, ըստ որում այդ ժամանակամիջոցում նա հստակարյա լիովին զիջում է իր դիրքերը Առաջավոր Ասիայում և միայն դաշինքների մեջ մտնում որոշ արևմտյան մարզերի հետ ընդդեմ Ասորեստանի։

75 Ուիշդիշը (ուրարտ. Ուգիշտի) տեղադրվում է Ուրմիա լճի արևելյան ափին, իսկ Չիկիրտուն՝ նրանից արևելք։

76 Այդ երկրները տեղադրվում են Ուրմիա լճից դեպի հարավ, մի կողմից Զագատայ դեպի և մյուս կողմից Կիզիլ-Ուզենի վտակների միջև։ Տե՛ս N. Adontz, Histoire d'Arménie, Paris, 1946, էջ 99։

77 И. М. Дьяконов, ВВНУ, 46(52)։

78 Նույն տեղում, 46 (75)։

79 Այդ արշավանքի արդյունքները համառոտակի ամփոփված են Սարգոնի տարեգրության մեջ, իսկ մանրամասն և պատկերավոր նկարագիրը տրված է այսպես կոչված «Լուվրի աղյուսակի» ստվարածավալ տեքստում։ Տե՛ս Fr. Thureau-Dangin, Une relation de la huitième campagne de Sargon, Paris, 1912։

80 Միանգամայն իրավացի է ն. Ադոնցը, երբ Ռուսա I-ի թագավորության վերջը համարում է մ. թ. ա. 713 թ. (ի տարբերություն տրադիցիոն 714 թ.)։ N. Adontz, Histoire d'Arménie, Paris, 1946, էջ 193։

БИАЙНИЛИ-УРАТУ В ПЕРИОД СВОЕГО РАСЦВЕТА

Н. В. АРУТЮНЯН

(Р е з ю м е)

В статье рассматривается военно-политическая история Биайнили-Урарту в период его наивысшего могущества — с начала правления Аргишти I (786 г. до н. э.) вплоть до предпоследнего года царствования Русы I (714 г. до н. э.). В указанный период истории Ванское царство в основном обеспечивало свою гегемонию в Передней Азии.

Биайнили-Урарту особо отличился в период правления Аргишти I (786—764 гг. до н. э.). При нем границы влияния этого древневосточного государства доходили вплоть до Ассирии на юге, северных и восточных берегов Урмийского озера и среднего течения реки Дияла — на востоке и юго-востоке, правобережных территорий бассейнов верхнего и среднего течения реки Евфрат (вплоть до Северной Сирии) — на западе и юго-западе, бассейна реки Чорох, районов к северу от оз. Чалдыр, северо-западных берегов оз. Севан — на севере.

Биайнили-Урарту в Передней Азии успешно сохранил первенство также на протяжении первых двух десятилетий царствования Сардури II (764—742 гг. до н. э.). Этот урартский царь в основном обеспечивал те же пределы Биайнили-Урарту, которые существовали при его отце — Аргишти I. Однако поражение, нанесенное Сардури II Тиглатпаласаром III в 743 и 735 гг. до н. э. в Северной Сирии, в значительной мере ухудшило позиции Ванского царства на юге, юго-западе и юго-востоке.

Преемник же Сардури II — Руса I своими военными успехами особо отличился на северо-востоке, в бассейне оз. Севан и в сопредельных территориях. Наряду с четырьмя областями на западном и южном побережьях Севанского озера, которые стали объектами завоевания еще при Сардури II, Руса I покорил также 19 других «стран», расположенных «с той стороны озера, в горах высоких». Господство Биайнили-Урарту на этих далеких территориях северо-восточной периферии сохранилось, по-видимому, до конца правления Русы I. Далее Руса I укрепил свои позиции на юго-востоке — в известном военно-стратегическом и культовом центре Ардини-Мусасир и с активной помощью его одержал на юге победу над Ассирией.

Впоследствии, по мере нового возвышения Ассирии при Саргоне II и появления на древнем Востоке киммеров — новых противников Русы I, позиции Биайнили-Урарту на арене переднеазиатской истории постепенно стали ухудшаться. К тому же знаменитый поход Саргона II в 714 г. до н. э. окончательно отодвинул Биайнили на задний план и лишил его целого ряда богатых земледельческих и скотоводческих центров в бассейне оз. Урмия, к востоку, югу и юго-востоку от оз. Ван и т. д. Таким образом, 714 год до н. э. фактически стал не только годом заката царствования Русы I, но и началом упадка Биайнили-Урарту в целом.